

（清）王夫之 撰

李一忻 点校

船山易学集成

周易外传

天生神物，圣人则之。
天地变化，圣人效之。
天垂象，见吉凶，圣人象之。
河出图，洛出书，圣人则之。

九州出版社

周

易

外

传

(衡阳)王夫之
撰

周易外传目录

周易外传卷一	(9)
乾	(9)
坤	(21)
屯	(25)
蒙	(29)
需	(32)
讼	(34)
师	(36)
比	(38)
小畜	(40)
履	(42)
泰	(45)
否	(48)
周易外传卷二	(53)
同人	(53)
大有	(55)
谦	(59)
豫	(61)
随	(63)

蛊	(65)
临	(66)
观	(69)
噬嗑	(72)
贲	(74)
剥	(79)
复	(82)
无妄	(87)
大畜	(92)
颐	(94)
大过	(98)
坎	(100)
离	(103)
周易外传卷三	(105)
咸	(105)
恒	(108)
遁	(110)
大壮	(112)
晋	(115)
明夷	(116)
家人	(118)
睽	(120)
蹇	(124)
解	(127)

损	(130)
益	(133)
夬	(136)
姤	(138)
萃	(140)
升	(142)
困	(144)
井	(149)
周易外传卷四	(153)
革	(153)
鼎	(155)
震	(157)
艮	(160)
渐	(166)
归妹	(168)
丰	(170)
旅	(172)
巽	(174)
兑	(176)
涣	(180)
节	(182)
中孚	(184)
小过	(186)
既济	(188)

未济	(191)
周易外传卷五	(199)
系辞上传第一章	(199)
系辞上传第二章	(210)
系辞上传第三章	(213)
系辞上传第四章	(216)
系辞上传第五章	(221)
系辞上传第六章	(228)
系辞上传第七章	(231)
系辞上传第八章	(234)
系辞上传第九章	(237)
系辞上传第十章	(243)
系辞上传第十一章	(245)
系辞上传第十二章	(248)
周易外传卷六	(253)
系辞下传第一章	(253)
系辞下传第二章	(259)
系辞下传第三章	(262)
系辞下传第四章	(264)
系辞下传第五章	(266)
系辞下传第六章	(277)
系辞下传第七章	(280)
系辞下传第八章	(283)
系辞下传第九章	(285)

系辞下传第十章	(289)
系辞下传第十一章	(292)
系辞下传第十二章	(294)
周易外传卷七	(297)
说卦传	(297)
序卦传	(316)
杂卦传	(337)

周易外传卷一

䷀ 乾

—

道，体乎物之中以生天下之用者也。物生而有象，象成而有数，数资乎动以起用而有行，行而有得于道而有德。因数以推象，象自然者也，道自然而弗藉于人。乘利用以观德，德不容已者也，致其不容已而人可相道。道弗藉人，则物与人俱生以俟天之流行，而人废道；人相道，则择阴阳之粹以审天地之经，而《易》统天。故乾取象之德而不取道之象，圣人所以扶人而成其能也。盖历选于阴阳，审其起人之大用者，而通三才之用也。天者象也，乾者德也，是故不言天而言乾也。

且夫天不偏阳，地不偏阴；男不偏阳，女不偏阴；君子不偏阳，小人不偏阴。天地其位也，阴阳其材也，乾坤其德也。材无定位而有德，德善乎材以奠位者也，故曰“天行健”。行则周乎地外，入乎地中，而皆行矣，岂有位哉！是故男德刚而女德柔，君子德明而小人德暗。男女各有魂魄，君子小人各有性情。男不无阴，而以刚奇施者，其致用阳；女不无阳，而以柔偶受者，其致用阴。是故《易》之云乾，云其致用者而已。

由此言之，君子有情，而小人有性，明矣。故小人之即于暗也，岂无颖光不昧、知惭思悔之时哉！此则乾之丽于小人者未尝绝。唯恃其自然，忘其不容已，则乾不绝小人而小人绝乾。故《易》于小人，未尝不正告焉。穆姜筮占四德而惧，其验也。六阳之卦为乾，乾为天，《易》不云天而云乾，用此义也。

或曰：“男不偏阳，女不偏阴，所以使然者天地。天不偏阳，地不偏阴，所以使然者谁也？”

曰：“道也。”

曰：“老氏之言曰：‘有物混成，先天地生。’今曰‘道使天地然’，是先天地而有道矣；‘不偏而成’，是混成矣。然则老子之言信乎？”

曰：“非也。道者天地精粹之用，与天地并行而未有先后者也。使先天地以生，则有有道而无天地之日矣，彼何寓哉？而谁得字之曰道？天地之成男女者，日行于人之中而以良能起变化，非碧霄黄垆，取给而来观

之，奚况于道之与天地，且先立而旋造之乎？

“若夫‘混成’之云，见其合而不知其合之妙也。故曰‘无极而太极’，无极而必太极矣。太极动而生阳，静而生阴，动静各有其时，一动一静，各有其纪，如是者乃谓之道。今夫水谷之化为清浊之气以育荣卫，其化也合同，其分也纤悉，不然则病。道有留滞于阴阳未判之先而混成者，则道病矣，而恶乎其生天地也！”

“夫道之生天地者，则即天地之体道者是已。故天体道以为行，则健而乾，地体道以为势，则顺而坤，无有先之者矣。体道之全，而行与势各有其德，无始混而后分矣。语其分，则有太极而必有动静之殊矣；语其合，则形器之余，终无有偏焉者，而亦可谓之‘混成’矣。夫老氏则恶足以语此哉！”

故圣人见道之有在于六阳者，而知其为乾之德。知为其德之乾，则择而执之以利用，故曰：“君子行此四德者，故曰乾元亨利贞”也。

二

“贞”者，事之干也，信也。于时为冬，于化为藏，于行为土，于德为实，皆信也。

然则四德何以不言智乎？《彖》曰“大明终始，六

位时成”，则言智也。今夫水，火资之以能熟，木资之以能生，金资之以能莹，土资之以能浹。是故夫智，仁资以知爱之真，礼资以知敬之节，义资以知制之宜，信资以知诚之实；故行乎四德之中，而彻乎六位之终始。终非智则不知终，始非智则不知始。故曰“智譬则巧也”，巧者圣之终也。曰：“择不处仁，焉得智！”择者仁之始也。是智统四德而遍历其位，故曰“时成”。各因其时而藉以成，智亦尊矣。虽然，尊者非用，用者非尊，其位则寄于四德而非有专位也。

今夫水，非火则无以济，非木则无以屯，非金则无以节，非土则无以比。是故夫智，不丽夫仁则察而刻，不丽乎礼则慧而轻，不丽乎义则巧而术，不丽乎信则变而谄，俱无所丽，则浮荡而炫其孤明。幻忽行则君子荒唐，机巧行则细人捭阖。故四德可德而智不可德；依于四德，效大明之用，而无专位。故曰“君子行此四德者”，知而后行之，行之贵，而非但知也。

惟不知此，故老氏谓上善之若水，而释氏以瓶水青天之月为妙悟之宗。其下者则刑名之察，权谋之机，皆崇智以废德。然乃知《大易》之教，为法天正人之极则也。子曰：“逝者如斯夫，不舍昼夜。”夫逝者逝矣，而将据之以为德乎？

三

先儒之言“元”曰：“天下之物，原其所自，未有不善。成而后有败，败非先成者也；有得而后有失，非得而何以有失也？”

请为之释曰：“原其所自，未有不善”，则既推美于大始矣。抑据成败得失以征其后先，则是形名器数之说，非以言德矣。

《文言》曰：“元者，善之长也。”就善而言，元固为之长矣。比败以观成，立失以知得，则事之先，而岂善之长乎！《彖》曰：“大哉乾元，万物资始。”元者，统大始之德，居物生之先者也。成必有造之者，得必有予之者，已臻于成与得矣，是人事之究竟，岂生生之大始乎！

有木而后有车，有土而后有器，车器生于木土，为所生者为之始。操之断之，埏之埴之，车器乃成，而后人乃得之。既成既得，物之利用者也，故曰“利物和义”。成得之未败失者，利物之义也。

夫一阴一阳之始，方继乎善，初成乎性，天人授受往来之际，止此生理为之初始。故推善之所自生，而赞其德曰“元”。成性以还，凝命在躬，元德绍而仁之名

乃立。天理日流，初终无间，亦且日生于人之心。唯嗜欲薄而心牖开，则资始之元，亦日新而与心遇，非但在始生之俄顷。而程子“鸡雏观仁”之说，未为周遍。要其胥为所得所成之本源，而非从功名利赖之已然者争败失之先，则一也。意者，立成败得失之衡，以破释氏之淫辞耶？则得之尔矣。

释氏之言，销总、别、同、异、成、坏之六相，使之相参相入，而曰“一念缘起无生”。盖欲齐成败得失于一致，以立真空之宗。而不知败者败其所成，失者失其所得，则失与败因得与成而见，在事理之已然，有不容昧者。故奖成与得，以著天理流行之功效，使知败与失者，皆人情弱丧之积，而非事理之所固有，则双泯理事，捐弃伦物之邪说，不足以立。虽然，于以言资始之“元”，则未也。

是故合成败、齐得失以为宗，释氏“缘起”之旨也。执成败、据得失以为本，法家“名实”之论也。执其固然，忘其所以然，而天下之大本不足以立；以成为始，以得为德，而生生之仁不著。吾惧夫执此说者之始于义而终于利矣。

夫功于天下，利于民物，亦仁者之所有事。而以为资始之大用即此在焉，则“享其利者为有德”；亦且不知君子正谊明道之志，未尝摈失与败而以为非道之存，况天之育万物而非以为功者哉！“元”者仁也，“善之长”也，君子之以长人者也。成败得失，又奚足论之有！

四

《易》之有位也，有同异而后有贵贱，有应感而后有从违。若夫乾，则六阳均而成象者也。合六如一，不见其异，六均一致，不相为感，故曰“大明终始”。终始不殊，六龙皆御矣。

惟既已成乎卦也，则亦有其序也。不名之为贵贱，而名之曰先后。先后者时也，故曰“六位时成”。君子之安其序也，必因其时。先时不争，后时不失，尽道时中以俟命也。

乃均之为龙德，则固不可得而贵贱之。初者，时之“潜”也；二者，时之“见”也；三者，时之“惕”也；四者，时之“跃”也；五者，时之“飞”也；上者，时之“亢”也。一代之运，有建、有成、有守；一王之德，有遵养、有燮伐、有耆定；一德之修，有适道、有立、有权；推而大之天地之数，有子半、有午中、有向晦；近而取之夫人之身，有方刚、有既壮、有已衰；皆乾之六位也。故《象》曰“君子以自强不息”，勉以乘时也。

然则初之“潜龙”，其异于蛊之“高尚”、遁之“肥”明矣。太王翦商以前，公刘迁豳以后，周之潜也。

十三年之侯服，武之潜也。而不特此，礼所自制，乐所自作，治所自敷，教所自立，未有事而基命于宥密，终日有其潜焉。有其“潜”，所以效其“见”也。

若秦之王也，缪、康以来，献、武以降，汲汲于用以速其飞，而早已自处于亢。当其潜而不能以潜养之，则非龙德矣。非龙德而尸其位，岂有幸哉！故初之“勿用”，天所以敦其化，人所以深其息。故曰“君子以成德为行，日可见之行”，此之谓也。

五

天以不远物为化，圣人以不远物为德，故天仁爱而圣人忠恕。未有其德，不能无歉于物；有其德者，无所复歉于己。初之为潜，龙德成矣。龙德成而有绝类于愚贱之忧，则大而化者二之功，迓而察者将无为二之所不用也？虽然，彼龙者，岂离田以自伐其善哉！故曰“见龙在田”。

王道始于耕桑，君子慎于桔袷。尸愚贱之劳，文王所以服康田也。修愚贱之节，卫武所以勤洒扫也。故天下蒙其德施，言行详其辨聚，坦然宽以容物，温然仁以聚众，非君德谁能当此哉！位正中而体居下，龙于其时，有此德矣。然则驰情于玄悦，傲物以高明者，天下岂“利见”有此“大人”乎！